

Ka-sàu (咳嗽)

張復聚

先生驚治嗽，塗水驚 liáh 漏，總舖師驚食晝。世間三項 pháiⁿ 剃頭，ka-sàu 排做頭。

Ka-sàu ê 原因真 chē，上根本--ê 是 Sàu-kin(cough receptor)受刺激；Sàu-kin 主要 tòà tī 呼吸系統（咽喉、肺管、細肺管、幼肺管 kap 肺 phók-á），mā 有 tòà tī 食道 kap 胃--ê。刺激分四種：

1. 化學性--ê，像空氣--ni ê 硫化物(sulfur dioxide)、臭氧(ozone)、一氧化碳(carbon monoxide)、鉛(lead)，也就是工廠 kap 汽機車放--出來 ê 「臭屁」--la！

2. 溫度變化，siuⁿ kôaⁿ、siuⁿ 熱。

3. 物理性--ê，肺管內 iah 是肺管外有血筋瘤、生癌 ê 時，會 teh 著肺管。

4. 發炎，像 K.M.（感冒）、肺管炎、肺癆。

這四種原因，有 kóa 重疊 ê 所在，有 ê 嗽，原因 mā m-tāⁿ kan-taⁿ 一種 niâ。

Lán lóng 知影 he-ku 喘(bronchial asthma)『氣喘』ê 人 éng-éng lóng 會嗽，mā 會喘，m-koh 有一種號做 Cough asthma ê 病，患者 kan-taⁿ 會嗽，bē 喘。

Lán teh 嗽 ê 時，ài 考慮幾點：

1. 急性 iah 慢性？

2. 有發燒--無？會 hiùhⁿ--bē？

3. 有痰--無？若有，siáⁿ 款痰？

4. 有特殊病況--無？（同性性關係？食薰？環境因素？注 mô-hui？）

急性 ê ka-sàu 普通 lóng 是 K.M.，若無就是肺炎；若肺炎，一定有發燒，而且會燒到 40 度 C. hia。若 ka-sàu koh 嚨喉會疼、sau 聲，he 就是咽喉肺管炎；Iah 若鼻 á 過敏--ê，鼻水倒流（tó tī 眠床 ê 時）mā 會引起 ka-sàu，這款嗽是慢性--ê、久長--ê（鼻 á 過敏是醫 bē 離療--ê）。

有一款嗽，嗽聲像狗 leh 吠，破 chhéh 破 chhéh，台語我 kā 號做「破 chhéh 嗽」（barking cough），若兩三歲 ê 細漢 gín-á 有

這款症頭，chiok pháiⁿ-khang, ài 緊送去入院做呼吸補助治療(插一條管入去肺管內)，若無，發炎 siuⁿ 嚴重會 kā 肺管 that 掉--去，有可能幾點鐘內一命烏有--去，這種病叫做 Croup 『哮喘』。

時間 mā ài 考慮，暝--時 khah gâu 嗽，可能是鼻水倒流，mā 可能是心臟衰弱，tó tī 眠床 khah 會嗽，peh 起來坐--le 就 khah bē。

我 bat tú 過一個嗽 chiok 久 lóng bē 好--ê，尾--a 為著胃 cho-thiàⁿ 去做胃鏡，發現胃潰瘍，食胃藥 á kā 胃醫好，嗽也就好--去 a。Che 就是講胃--ni mā 有 sàu-kin。

檢查痰 mā 真要緊，痰真 chē、味臭臭、黃 gìm-gìm，可能是肺管擴大破--去，可能是肺 eng(lung abscess)；痰有血絲 koh 生波，可能是心臟無力引起肺積水 (pulmonary edema)；痰 chiok chē chiok chē，像 lô-liâm-nōa，可能是肺癌。

身體檢查 mā ài 注意，嗽 chiok 久，有時發燒，人 sán--去，ài 想著肺癆；肺部聽診有水 phók-á 聲，表示肺部內底有水，可能是肺炎，mā 可能是心臟衰弱引起肺積水；若喘氣會 hiùhⁿ，當然是 he-ku。

Sò--落去是 hip 電光片、痰 ê 檢查(用 Khian-bi-khió 『顯微鏡』) kap 細菌培養，若準肺癌，可能 tī 痰看會著癌細胞；若 he-ku 喘，mā 會 tàng tī 痰--ni 看著酸性 ê 白血球(eosinophil)；若是細菌引起 ê 肺管炎 iah 肺炎，mā 看會著細菌 kap 白血球 ê 死體 tī 痰--ni。Koh 來，會 sái 做肺功能 ê 測驗，若 『慢性阻塞性肺病』(肺管擴大、he-ku 喘、慢性肺管炎) ê 人，吸氣 ê 功能是 bē-bái, m̄-koh pùn 氣就 chiok bái, mā 有肺管鏡會 tàng long 入去肺管，用目 chiu 直接看有生 siáⁿ pháiⁿ 物--無，若有 giâu 疑，mā 會 tàng 挾一 tè 組織起來做病理切片檢查，上尾步，koh 有超音波 kap 核子醫學 ê 檢查，án-ni，就 chhōe 有嗽 ê 病因。

上尾，lán 來講「食薰嗽」。薰若食久，肺管一定會發炎，免講 mā 會嗽，這款嗽，見若 suh 薰就 khah 會嗽，無食薰就 khah bē。無 siáⁿ 痰，若有，mā 像 lô-liâm-nōa iah 是白波 á nōa án-ni。Bē 發燒，人 mā bē siau-sán-lóh-bah, che 就是食薰嗽！

Ah, 食薰 「kái」 bái--le !